

**Namminersorluni inuussutissarsiutimik aallarnisaaneq ingerlatsinerlu  
ajornannginnerulerlunilu orniginarnerulernissaa anguniarlugu qanoq  
iliorsinnaanerluta pillugu oqallisissiatut siunnersuut**  
(Inatsisartunut ilaasorta q Nivi Olsen, Demokraatit)

**Akissuteqaat**

(Nunanut Allanut, Inuussutissarsiornermut Niuernermullu Naalakkersuisoq)

**Siullermeerineq**

Namminersorlutik inuussutissarsiutilinnut atugassarititaasut pitsaanerulersinneqarnissaat pillugu Inatsisartunut ilaasortap Nivi Olsenip, Demokraatit, apeqquteqaat aallaavigalugu oqallisissiaanut Naalakkersuisut sinnerlugit qutsavigaara.

Namminersorlutik inuussutissarsiutillit pilersitsineri, isumassarsiaat, nutaaliaallu eqqarsaatigalugit inuussutissarsiornep aaqqissugaaneranut pisortat iluaqutaasumik sinaakutissiinissaat Naalakkersuisut aallaavigivaat. Ilutigisaanik namminersorluni inuussutissarsiummik aallartitsinissaq, ingerlatsinissarlu pisariillunilu pilerinartuusaaq.

Inuussutissarsiutilinnut pitsaanerumik sinaakutissaqartitsinissaq Naalakkersuisut ataavartumik sulissuguarpaat. Tamanna inuussutissarsiutit pillugit inatsisip, periusissiat, ikiorsiissutillu ataavartumik nutarterneqartarnerisigut erserpoq. Taamaakkaluartoq suliat ingerlanneqartarnerat allaffissorneruallaalpat tamanna suliffeqarfinnut minnerusunut, akunnattunullu unammillernarsinnaammat Naalakkersuisut ilisimavaat pitsanngorsarusullugulu. Tamannarpiaq patsisigalugu inuussutissarsiutinut allatigut ikiorsiinissami periarfissanik misissuisoqarnissaanut Naalakkersuisut suliniuteqarusupput.

Eqqaamasariaqarparput nunatsinni innuttaasut amerlasoorsuunnginnatta sineriassuarmilu siammarsimalluta. Inuussutissarsiutinut ikiorsiisarnermittaaq sinerissap, nunaqarfiillu ukkatarineqarnissaat pingaaruteqarpoq. Ilutigisaanik unammilleqatigiinneq naapertuilluanngitsumik tunngaveqannginnissaa eqqumaffigissavarput suliffeqarfiit nunanit allaneersut najukkami suliffeqarfinnik ingiaasarnerat ajornanngippallaartarmat. Taamaattumik suliffeqarfiit minnerusut unammillerneqarnernut illersorneqarnissaat Naalakkersuisut anguniarusuppaat.

Ukiumoortumik naatsorsuutit kiisalu kukkunersiuisarneq pillugit inatsisinut allannguutit nutaat ukioq manna atuutilerput. Nunatsinni suliffeqarfinnut ullutsinnut naleqquttunik sinaakutissiiumalluni, inuussutissarsiutit pillugit inatsimmik ataavartumik nutarterisarneq naammassineqaqqammerpoq. Ilanngullugu oqaatigineqarsinnaavoq, ingerlatseqatigiiffiit akileraarutaat ukioq aningaasarsiorfiusoq 2021 aallarnerfigalugu 30 procentimit 25 procentinut appartinneqarmat. Namminersorluni inuussutissarsiornissaq pilerinarsarniarlugu allannguneq akuersissutigineqarnikuuvoq.

Ingerlatseqatigiiffinnut, naatsorsuutitut, kukkunersiuisarnernullu suliassaqarfiit tiguneqarnissaat pillugu aallarniutaasumik sulineq Naalakkersuisut aallartinnikuuaat. Nunatsinni namminersorluni inuussutissarsiummik aallartitsinissaq, ingerlatsinissarlu pisariillisarsinnaanerlutigu, pilerinarsarsinnaanerlutigulu misissorneqarnissaanut tamanna periarfissatsialaavoq.

Inuussutissarsiornikkut ineriartortitsinerni nutaani namminersortut amerlanerusut aningaasaliinissaasa qulakkeerneqarnissaa siunertaralugu, takornarialerinermi kismaassinissamik akuersissummik qinnuteqarsinnaaneq ukialuit qaangiummata periarfissanngortinneqarpoq. Inuussutissarsiortut ujartuinerisigut tamanna periarfissanngortinneqarpoq. Nunatsinni namminersortut piffissamut ungasinnerusumut aningaasaliinissaannut tunngavissiinerunissaq, kismaassinissamik akuersissuteqartarnerni eqqarsaataanikuuvoq. Takornarialerinermi periusissiassamik nutaamik suliaqarnitsinni, arlaatigut pisariillisaasinnaassanerluta nalilersussavarput.

Nutaaliorneq eqqarsaatigalugu Namminersorlutik Oqartussat inuussutissarsiornikkut siuarsaasarnermut ingerlatseqatigiiffia Nalik Ventures, inuussutissarsiutinnut aaqqiissutissat assigiinngitsut suliarisarpai. Nutaaliorluni inuussutissarsiutitut ikiorsiisarnermi aaqqiissutit, Nalik Venturesip inuussutissarsiornikkut siuarsaasarnermik aaqqissuussinerani qitiusut ilagaat. Taamaalilluni isumassarsianik ineriartortitsinissamut, suliffeqarfimmillu pilersitsinissamut ikiorserneqarnissaq ullumikkut periarfissaareerpoq. Nutaaliorneqarnissamut kajumissusillit Nunatsinni suliffeqarfissaminnik pilersitsinissaasa ajornannginnerulersinneqarnissaa, inuussutissarsiornikkut siuarsaasarnissamik suliniutip siunertaraa.

Nunatsinni suliffeqarfiit avammut nioqquteqartarnerini annertusaanissamik Naalakkersuisut aamma kissaateqarput. Taamaalilluni avammut nioqquteqartarneq siunissami ajornannginnerulersikkumallugu, niuernermi pisariaqanngitsumik akimmiffiusartut piiarneqarnissaat ukkatarineqarpoq.

Siunissami sutigut pingaarnersiuisinnaanissarput oqallisigisinnaaniassagatsigu, ullup ingerlanerani oqallinnissatsinni isummatsinnik eqqartueqatigiinnissatsinnut qilanaarpunga.

Inatsisartunut ilaasortap Nivi Olsenip, Demokraatit, siunnersuuteqarneranut Naalakkersuisut sinnerlugit qujaffigeqqikkusuppara. Partiit tamarmik isumaat tusassallugit qilanaaraara, oqallilluarnissassinillu kissaappassi.